

## 66% građana BiH podržava priključenje EU

04/02/2010 19:39 by Administrator

Prema posljednjem istraživanju Gallup Europe, oko 66% građana BiH smatra da bi članstvo u EU bila pozitivna stvar, što predstavlja povećanje za 18% u odnosu na 2008. godinu. Istraživač Gallup-a Andrzej Pyrka jučer je predstavio istraživanja javnog mnjenja o stavovima i percepciji građana Bosne i Hercegovine u

svezi s pitanjima pridruženja Europskoj uniji. Rezultati ukazuju na generalno nezadovoljstvo građana životom u BiH te nizak stupanj povjerenja u domaću vlast.

Pozitivno mišljenje o članstvu BiH u EU najviše je zabilježeno među Bošnjacima (77%) i Hrvatima (73%), dok je procent među Srbima nešto manji (48%). Treba također napomenuti da je 33% ispitanika u RS neutralno raspoloženo prema prednostima članstva. Prema mišljenju čak 93% ispitanika priključenje EU donijet će slobodu putovanja, dok 85% očekuje veću mogućnost zaposlenja, a 76% od EU očekuje veći ekonomski razvoj BiH. Također, građani smatraju da bi se ulaskom u EU povećala sigurnost (75%), pojačala vladavina prava (74%) i politička stabilnost (72%). Rezultati ovog istraživanja su također pokazali kako 77% građana smatra da se BiH kreće u krivom smjeru. Kada je u pitanju vizna liberalizacija, 66% građana Federacije BiH krivi vlast i političare za odgađanje liberalizacije viznog režima, dok je u Republici Srpskoj ovaj postotak 34%. Građani BiH najlošije ocjenjuju rad vlasti na državnom nivou (60%), a zatim na entitetskom (51%) i lokalnom (19%). A to se tiče prisutnosti korupcije na svim nivoima vlasti, 44% ispitanika smatra da je korupcija najprisutnija na državnom nivou, na entitetskom (34%) te lokalnom (29%). Organizirani kriminal direktno utječe na svakodnevni život građana za 27% ispitanika, što predstavlja najviši postotak u regiji. Čak 82% građana FBiH smatra da je BiH potreban novi Ustav, dok je taj stav izrazilo 44% ispitanika u RS. Ukupno 48% ispitanika u FBiH je izjavilo kako treba ojačati vlast na državnom nivou u skladu sa EU principima, s tim da se osiguraju prava etničkih grupa, dok 40% ispitanika u RS misli da bi trebalo ojačati još tri etničke grupe. Gallup Balkan Monitor je rezultat uspješnog partnerstva između Europskog fonda za Balkan i Gallupa Europe. "Monitor" je prvo dubinsko istraživanje koje se sprovodi na području cijelog Zapadnog Balkana. Ono odražava stavove stanovnika regiona o svim aspektima njihovih života, te pruža strateški uvid u današnje sociološke, ekonomske, političke i multikulturalne dimenzije ovog regiona. Podacima Gallup Balkan Monitora se redovno služe političari u europskim institucijama, predstavnici međunarodnih organizacija, novinari i analitičari.

Izvor vijesti: reci.ba